

四庫全書

集部

欽定四庫全書

集部

唐人萬首絕句選卷一至三

詳校官中書臣涂日煥

主事銜臣徐以坤覆勘

總校官進士臣朱餘

校對官主事臣陳墉

膳錄監生臣單呈智

欽定四庫全書

集部八

唐人萬首絕句選

總集類

提要

臣等謹案唐人萬首絕句選七卷

國朝王士禎編洪邁唐人萬首絕句務求盈數
踏駁至多宋倉部侍郎福清林清之真父鈔
取其佳者得七言一千二百八十首五言一
百五十六首六言十五首勒為四卷名曰唐

絕句選見於陳振孫書錄解題蓋十分之中
汰其八分有奇然其書不傳無由知其善否
士禎此編刪存八百九十五首作者二百六
十四人更十分而取其一矣其書成于康熙
戊子距士禎之沒僅三年最為晚出又當田
居閒暇之時得以從容校理故較他選為精
審然其序謂以當唐樂府則不盡然樂府主
聲不主詞其采詩入樂亦不專取絕句士禎

此書實選詞而非選聲無庸務為高論也乾隆四十六年九月恭校上

總纂官

臣紀昀

臣陸錫熊

臣孫士毅

總校官

臣

陸

費

墀

唐人萬首絕句選序

漁洋山人撰宋洪氏唐人萬首絕句既成或問曰先生撰唐人絕句意何居應之曰吾以庀唐樂府也曰絕句也而謂之樂府何也曰樂府之名其來尚矣世謂始於漢武非也按史記高祖過沛詩三侯之章又令唐山夫人為房中之歌西京雜記又謂戚夫人善歌出塞入塞望歸之曲則樂府實始漢初武帝時增天馬赤蛟白麟等十九章以李延年為協律都尉集五經之士相與次第其聲

通知其意而樂府始盛其云武帝者託始焉爾東漢之末曹氏父子兄弟雅擅文藻所為樂府悲壯與崛頗有漢之遺風降及江左古意寢微而清商繼作於是楚調吳聲西曲南弄雜然興焉逮於有唐李杜韓柳元白張王李賀孟郊之倫皆有冠古之才不沿齊梁不襲漢魏因事立題號稱樂府之變然考之開元天寶已來宮掖所傳梨園弟子所歌旗亭所唱邊將所進率當時名士所為絕句爾故王之渙黃河遠上王昌齡昭陽日影之

句至今豔稱之而右丞渭城朝雨流傳尤衆好事者至譜為陽關三疊他如劉禹錫張祜諸篇尤難指數由是言之唐三百年以絕句擅場即唐三百年之樂府也而子又奚疑宋洪文敏公邁常集唐絕句至萬首經進孝宗御覽褒賜優厚余少習是書惜其踏駁久欲為之掇定而未暇也歸田之五載為康熙戊子乃克成之而以問答之語次為序云

欽定四庫全書

序

欽定四庫全書

唐人萬首絕句選卷一

宋 洪邁 元本

刑部尚書王士禎選

五言一

王勃

寒夜思 三首

久別侵懷抱他鄉變容色月夜調鳴琴相思此何極

雲間征思斷月下歸愁切鴻鴈西南飛如何故人別
朝朝碧山下夜夜滄江曲復此遙相思清尊湛芳醑

別人

霜華淨天末霧色籠江際客子常畏人胡為久留滯

思歸

長江悲已滯萬里念將歸況復高風晚山山黃葉飛

盧照鄰

曲江花

浮香繞曲岸圓影覆華池常恐秋風早飄零君不知

駱賓王

易水

此地別燕丹壯士髮衝冠昔時人已沒今日水猶寒

上官儀

洛堤曉行

脈脈廣川流驅馬歷長洲鵲飛山月曙蟬噪野風秋

韋承慶

南行別弟

萬里人南去三春鴈北飛未知何歲月得與爾同歸

宋之問

塗中寒食

馬上逢寒食塗中屬暮春可憐江浦望不見洛橋人

送杜審言

卧病人事絕嗟君萬里行河橋不相送江樹遠含情

張說

蜀道後期

客心爭日月來往預期程
秋風不相待先到洛陽城

廣州作

去國歲方晏愁心轉不堪
離人與江水終日向西南

郭元振

子夜春歌二首

青樓含日光綠池起風色
贈子同心花殷勤此何極
陌頭楊柳枝已被春風吹
妾心正斷絕君懷那得知

蘇頲

汾上驚秋

北風吹白雲萬里渡河汾
心緒逢搖落秋聲不可聞

張九齡

自君之出矣

自君之出矣不復理殘機
思君如滿月夜夜減清輝

王適

江上梅

忽見寒梅樹花開漢水濱不知春色早疑是弄珠人

東方虬

王昭君二首

掩涕辭丹鳳銜悲向白龍單于浪驚喜無復舊時容
北地無花草春來不似春自然衣帶緩非是為腰身

盧僕

南樓望

去國三巴遠登樓萬里春傷心江上客不是故鄉人

途中

抱玉三朝楚懷書十上秦年年洛陽陌花鳥弄歸人

王維

答裴迪

淼淼寒流廣蒼蒼秋雨晦君問終南山心知白雲外

鳥鳴澗

雲溪雜題

人閒桂花落夜靜春山空月出驚山鳥時鳴春澗中

萍池

春池深且廣會待輕舟回
靡靡綠萍合垂楊掃復開

鸕鷀堰

乍向紅蓮沒復出青蒲颺
獨立何襜褕銜魚古查上

孟城坳

輞川集

新家孟城口古木餘衰柳
來者復為誰空悲昔人有

華子岡

飛鳥去不窮連山復秋色
上下華子岡惆悵情何極

斤竹嶺

檀欒映空曲青翠漾漣漪暗入商山路樵人不可知

鹿柴

空山不見人但聞人語響返景入深林復照青苔上

木蘭柴

秋山斂餘照飛鳥逐前侶彩翠時分明夕嵐無處所

南垞

輕舟南垞去北垞森難即隔浦望人家遙遙不相識

樂家瀨

颯颯秋雨中淺淺石溜瀉跳波自相賤白鷺驚復下

白石灘

清淺白石灘綠蒲向堪把家住水東西浣紗明月下

竹里館

獨坐幽篁裏彈琴復長嘯深林人不知明月來相照

辛夷塢

木末芙蓉花山中發紅萼磻戶寂無人紛紛開且落

漆園

古人非傲吏自關經世務偶寄一微官婆娑數株樹

山中送別

山中相送罷日暮掩柴扉春草明年綠王孫歸不歸

左掖梨花

閒灑堦前草輕隨箔外風黃鶯弄不足銜入未央宮

息夫人

莫以今時寵難忘舊日恩看花滿眼淚不共楚王言

相思子

紅豆生南國春來發幾枝
勸君休采擷此物最相思

班婕妤

宮殿生秋草君王恩幸疎
那堪聞鳳吹門外度金輿

雜詠二首

客自故鄉來應知故鄉事
來日綺窗前寒梅著花未
已見寒梅發復聞啼鳥聲
心心視春草畏向玉階生

裴迪

鹿柴

日夕見寒山便為獨往客不知深林事但有麇麇跡

木蘭柴

蒼蒼落日時鳥聲亂溪水綠溪路轉深幽興何時已

茱萸泥

飄香亂椒桂布葉間檀欒雲日雖迴照森沈猶自寒

宮槐陌

門前宮槐陌是向欽湖道秋來山雨多落葉無人掃

南垞

孤舟信風泊南垞湖水岸落日下崦嵫清波殊淼漫

金屑泉

潏潏澹不流金碧如可拾凌晨含素華獨往事朝汲

白石灘

跂石復臨水弄波情未極日下川上寒浮雲澹無色

送崔九

歸山深淺去須盡丘壑美莫學武陵人暫遊桃源裏

李白

玉階怨

玉階生白露夜久侵羅襪却下水精簾玲瓏望秋月

夜思

牀前明月光疑是地上霜舉頭望山月低頭思故鄉

銅官山

我愛銅官樂千年未擬還要須迴舞袖拂盡五松山

敬亭獨坐

衆鳥高飛盡孤雲去獨閒相看兩不厭只有敬亭山

青溪半夜聞笛

羌笛梅花引
吳溪隴水清
寒山秋浦月
腸斷玉關情

秋浦歌

愁作秋浦客
強看秋浦花
山川如剡縣
風日似長沙

送陸判官往琵琶峽

水國秋風夜
殊非遠別時
長安如夢裏
何日是歸期

重憶賀監

欲向江東去
將誰共舉杯
稽山無賀老
却棹酒船迴

杜甫

八陣圖

功蓋三分國名高八陣圖
江流石不轉遺恨失吞吳

孟浩然

送朱大入秦

遊人五陵去寶劍直千金
分手脫相贈平生一片心

祖詠

望終南殘雪

終南陰嶺秀積雪浮雲端林表明霽色城中增暮寒

崔國輔

銅雀臺

朝日照紅妝擬上銅雀臺畫眉猶未了魏帝使人催

采蓮曲

玉漱花紅發金塘水碧流相逢畏相失並著采蓮舟

王孫遊

自與王孫別頻看黃鳥飛應緣春草誤著處不成歸

怨詞

妾有羅衣裳秦王在時作為舞春風多秋來不堪著

少年行

遺却珊瑚鞭白馬驕不行章臺折楊柳春日路旁情

渭西別李崧

隴外長亭堠山深古塞秋不知嗚咽水何事向西流

崔顥

長干曲

三首

君家住何處妾住在橫塘停舟暫借問或恐是同鄉
家臨九江水來去九江側同是長干人生小不相識
下渚多風浪蓮舟漸覺稀那能不相待獨自逆潮歸

王昌齡

送張四

楓林已愁暮楚水復堪悲別後冷山月清猿無斷時
留別武陵田太守

按劍行千里微軀感一言曾為大梁客不負信陵恩

題僧房

梭擱花滿院苔蘚入閒房彼此名言絕空中聞異香

朝來曲

日昃鳴珂動花連繡戶春盤龍玉臺鏡唯待畫眉人

高適

詠史

尚有綈袍贈應憐范叔寒不知天下士猶作布衣看

岑參

見渭水思秦川

渭水東流去何時到雍州
憑添兩行淚寄向故園流

九日思長安故園

強欲登高去無人送酒來
遙憐故園菊應傍戰場開

王之渙

送別

楊柳東門樹青青夾御河
近來攀折苦應為別離多

登鶴雀樓

白日依山盡黃河入海流欲窮千里目更上一層樓

儲光義

江南曲

日暮長江裏相邀歸渡頭落花如有意來去逐船流

洛陽道

大道直如髮春日佳氣多五陵貴公子雙雙鳴玉珂

賈至

有贈

舞怯銖衣重笑疑桃臉開方知漢成帝虛築避風臺

王縉

別輞川

山月曉仍在林風涼不絕殷勤如有情惆悵令人別

崔興宗

留別王維

駐馬欲分襟清寒御溝上前山景氣佳獨往還惆悵

丘為

左掖梨花

冷豔全欺雪餘香乍入衣春風且莫定吹向玉階飛

張旭

清溪汎舟

旅人倚征棹薄暮起勞歌笑攬清溪月清輝不厭多

李華

奉寄彭城公

公子三千客人人願報恩應憐抱闕者貧病老夷門

蕭穎士

九日別元魯山

綿連漁川迴杳眇鴉路深彭澤興不淺臨風動歸心

崔曙

雨中送客

別愁復兼雨別淚還如霰寄言海上雲千里長相見

于李子

項羽

北伐雖全趙東歸不王秦空歌拔山力羞作渡江人

薛奇童

吳聲子夜歌

淨掃黃金堦飛霜皎如雪下簾彈箜篌不忍見秋月

韋應物

寄盧陟

柳葉遍寒塘曉霜凝高閣累日此留連別來成寂寞

宿永陽寄璚師

遙知郡齋夜凍雪封松竹時有山僧來懸燈獨自宿

秋夜寄丘員外

懷君屬秋夜散步詠涼天山空松子落幽人應未眠

荅王卿送別

去馬嘶春草歸人立夕陽元知數日別要使兩情傷

懷瑯琊二釋子

白雲埋大壑陰厓滴夜泉應居西石室月照山蒼然

登樓

茲樓日登眺流歲暗蹉跎坐厭淮南守秋山紅樹多

聞鴈

故園渺何處歸思方悠哉淮南秋雨夜高齋聞鴈來

劉長卿

春草宮懷古

君王不可見芳草舊宮春猶帶羅裙色青青向楚人

彈琴

泠泠七絃上靜聽松風寒古調雖自愛今人多不彈

送人往揚州

京口發梅花山中動泉脈
蕪城春草生君作揚州客

送上人

孤雲將野鶴豈向人間住
莫買沃洲山時人已知處

送靈澈

蒼蒼竹林寺杳杳鐘聲晚
荷笠帶斜陽青山獨歸遠

平蕃曲

絕漠大軍還平沙獨戍閒
空留一片石萬古在燕山

錢起

江行無題

五首

行背青山郭吟當白露秋風流無屈宋空詠古荊州
蛩響依莎草螢飛透水煙夜涼誰詠史空泊運租船
櫓慢開輕浪帆虛入暮雲客船雖自小容得庾將軍
只尺愁風雨匡廬不可登祗疑雲霧裏猶有六朝僧
湖口分江水東流獨有情當時好風物誰伴謝宣城

劉方平

采蓮曲

落日清江裏
荆歌豔楚腰
采蓮從小慣
十五即乘潮

京兆眉

新作蛾眉樣
惟將月裏同
有來凡幾日
相效滿城中

春雪

飛雪帶春風
徘徊亂繞空
君看似花處
偏在洛城東

張繼

感懷

調與時人背心將靜者論終年帝城裏不識五侯門
暢當

登鶴雀樓

迴臨飛鳥上高出世塵間天勢圖平野河流入斷山

顧況

憶舊遊

悠悠南國思夜向江南泊楚客斷腸時月明楓子落

丘丹

酬韋蘇州

久作煙霞侶暫將簪組親
還同褚伯玉入館忝州人
蓋嘉運

伊州歌

聞道黃花戍頻年未解兵
可憐閨裏月偏照漢家營

唐人萬首絕句選卷一

欽定四庫全書

唐人萬首絕句選卷二

宋 洪邁 元本

刑部尚書王士禎選

五言二

李益

江南曲

嫁得瞿唐賈朝朝誤妾期
早知潮有信嫁與弄潮兒

贈盧綸

世故中年別餘生此會同却將悲與病獨對朗陵翁

鷓鴣詞

湘江斑竹枝錦翅鷓鴣飛處處湘雲合郎從何處歸

揚州懷古

故國歌鐘地長橋車馬塵彭城郭邊柳偏似不勝春

揚州早鴈

江上三千鴈年年過故宮可憐江上月偏照斷根蓬

金吾子

繡帳博山爐銀鞍馮子都
黃昏莫攀折驚起欲棲烏

洛橋

金谷園中柳春來似舞腰
那堪好風景獨上洛陽橋

李端

聽箏

鳴箏金粟柱素手玉房前
欲得周郎顧時時誤拂絃

溪行遇雨寄柳中庸

日落衆山昏
瀟瀟暮雨繁
那堪兩處宿
共聽一聲猿

盧綸

塞下曲

四首

驚翎金僕姑
燕尾繡螭弧
獨立揚新令
千營共一呼
林暗草驚風
將軍夜引弓
平明尋白羽
沒在石稜中
月黑鴈飛高
單于遠遁逃
欲將輕騎逐
大雪滿弓刀
野幕敞瓊筵
羌戎賀勞旋
醉和金甲舞
雷鼓動山川

皇甫冉

送王司直

西塞雲山遠東風道路長人心勝潮水相送過潯陽

婕妤怨 二首

花枝出建章鳳輦發昭陽借問承恩者雙蛾幾許長
長信多秋氣昭陽借月華那堪閒永巷聞道選良家

淮口寄趙員外

欲逐淮潮上暫停魚子溝相望知不見終是屢回頭

司空曙

金陵懷古

輦路江楓暗宮朝野草春傷心庾開府老作北朝臣

送盧秦卿

知有前期在難分此夜中無將故人酒不及石尤風

韓翃

漢宮曲

繡幙珊瑚鉤香閨翡翠樓深情不肯道嬌倚鈿篋篋

柳中庸

江行

繁陰乍隱洲落葉初飛浦蕭蕭楚客帆暮入寒江雨

戴叔倫

題三閭大夫廟

沅湘流不盡屈子怨何深日暮秋風起蕭蕭楓樹林

關山月

一鴈過連營繁霜覆古城胡笳在何處半夜起邊聲

嚴維

送人往金華

明月雙谿水清風八詠樓少年為客處今日送君遊

朱放

題竹林寺

歲月人間促煙霞此地多殷勤竹林寺更得幾回過

武元衡

春日作

縱橫桃李枝澹蕩春風吹美人歌白苧萬恨在蛾眉

權德輿

敷水驛

空見水名敷秦樓往事無臨風駐征騎聊復將髭鬚

玉臺體

昨夜羣帶解今朝蟠子飛鉛華不可棄莫是藁砧歸

柳宗元

長沙驛

海鶴一為別存亡三十秋今來數行淚獨上驛南樓

江雪

千山鳥飛絕萬徑人蹤滅孤舟蓑笠翁獨釣寒江雪

劉禹錫

罷和州遊建康

秋水清無力寒山暮多思官閒不計程徧上南朝寺

經檀道濟故壘

萬里長城壞荒營野草秋秣陵多士女猶唱白符鳩

視刀環

常恨言語淺不如人意深今朝兩相視脈脈萬重心

三閣詞

珠薄曲瓊鉤子細見揚州北兵那得渡浪語判悠悠

淮陰行二首

今日轉船頭金烏指西北煙波與春草千里同一色

隔浦望行船頭昂尾憶憶無奈挑菜時清淮春浪軟

挑菜本作脫菜周益公詩話云山谷謂淮陰行情調殊麗惟脫菜時不可解予見古本作挑菜時東坡惠州詩水生挑菜渚恐用此語今從之○

詩話首句作隔浦望郎船與此小異

秋風引

何處秋風至蕭蕭送鴈羣朝來入庭樹孤客最先聞

紇那曲

楊柳鬱青青竹枝無限情周郎一回顧聽唱紇那聲

別蘇州

流水閭門外秋風吹柳條從來送客處今日自魂銷

孟郊

古別離

欲別牽郎衣郎今向何處不恨歸來遲莫向臨邛去

張籍

寄僧

松暗水涓涓夜涼人未眠西峰月猶在遙憶草堂前

涇州

行到涇州塞惟聞羌戍輦道旁雙古堠猶記向安西

令狐楚

遠別離

玳織黃金履金裝翡翠簪畏人相借問不擬到城南

思君恩

小苑鶯歌歇長門蜨舞多眼看春又去翠輦不曾過

從軍行

二首

暮雪連青海陰雲覆白山可憐班定遠生入玉門關
却望冰河閣前登雪嶺高征人幾多在又擬戰臨洮

王涯

閨人贈遠

二首

花明綺陌春柳拂御溝新為報遼陽客流光不待人
形影一朝別煙波千里分君看望君處祇是起行雲

張仲素

春閨思

裊裊城邊柳青青陌上桑提籠忘采葉昨夜夢漁陽

春遊曲

行樂三春節林花百和香當年重意氣先占鬪雞場

白居易

庾樓新歲

歲時銷旅貌風景觸鄉愁
牢落江湖意新年上庾樓

南浦別

南浦淒淒別西風嫋嫋秋
一看腸一斷好去莫回頭

勤政樓西柳

半朽臨風樹多情立馬人
開元一株柳長慶二年春

問劉十九

綠螳新醅酒紅泥小火爐
晚來天欲雪能飲一杯無

元稹

行宮

寥落古行宮，宮花寂寞紅。
白頭宮女在，閒坐說玄宗。

西還

悠悠洛陽夢，鬱鬱灞陵樹。
落日正西歸，逢君又東去。

李賀

馬詩二首

赤兔無人用，當須呂布騎。
吾聞果下馬，羈策任蠻兒。

颺叔去匆匆如今不羨龍夜來霜壓棧駮骨折西風

張祜

河滿子

故國三千里深宮二十年一聲河滿子雙淚落君前

玉樹後庭花

輕車何草草猶唱後庭花玉座誰為主徒悲張麗華

江南逢故人

河洛多塵事江山半舊遊春風故人夜又醉白蘋洲

徐凝

楊叛兒

哀怨楊叛兒
駘蕩君知否
香死博山爐
烟生白門柳

張起

春情

畫閣餘寒在
新年舊燕飛
梅花猶帶雪
未得試春衣

楊凌

賈客怨

山水路悠悠逢灘即滯留西江風未便何日到荊州

楊凝

柳絮

河畔多楊柳追遊盡狹斜春風一回送亂入莫愁家

唐彥謙

齊文惠宮人

認得前家令宮人淚滿裾不知梁佐命全是沈尚書

小院

小院無人夜烟斜月轉明清宵易悵悵不必有離情

賈島

劍客

十年磨一劍霜刃未曾試今日把似君誰有不平事

陸暢

雪

怪得朔風急前庭如月輝天人寧許巧剪水作花飛

沈如筠

閨怨

鴈盡書難寄愁多夢不成願隨孤月影流照伏波營

潘佐

送人之宣城

江畔送行人千山生暮氛謝安團扇上為畫敬亭雲

杜牧

題水西寺

三日去還住一生焉再遊含情碧溪水重上綦公樓

寄遠

隻影隨驚鴈單棲鎖畫籠
向春羅袖薄誰念舞臺風

江樓

獨酌芳春酒登樓已半醺
誰驚一行鴈衝斷過江雲

李商隱

漫成

霧夕詠芙蓉何郎得意初
此時誰最賞沈范兩尚書

張惡子廟

下馬奠椒漿迎神白玉堂如何鐵如意獨自與姚萇
追代廬家人嘲堂內

道却橫波字人前莫漫羞祇應同楚水長短入淮流

李夫人

一帶不結心兩股方安髻慚愧白茅人月沒教星替

滯雨

滯雨長安夜殘燈獨客愁故鄉雲水地歸夢不宜秋

餞席送人之梓州

莫歎萬重山君還我未還武關猶悵望何況百牢關

柳枝

集作無題本是律
詩上二句亦不同

本是丁香樹春條結始生王作彈碁局中心最不平
散關遇雪

劍外從軍遠無人與寄衣散關三尺雪回夢舊鴛機
溫庭筠

三月雪

三月雪連夜未應傷物華只緣春欲盡留著伴梨花

碧澗驛曉思

孤燈伴殘夢楚國在天涯月落子規歇滿庭山杏花

許渾

早春憶江南

雲月有歸處故山清洛南如何一花發春夢徧江潭

塞下曲

夜戰桑乾北秦兵半不歸朝來有鄉信猶自寄寒衣

趙嘏

寒塘

曉髮梳臨水寒塘坐見秋鄉心正無限一鴈過南樓

施肩吾

湘竹詞

萬古湘江竹無窮奈怨何年年長春筍只是淚痕多

李頻

渡漢江

嶺外音書絕經冬復歷春近鄉情更怯不敢問來人

孟遲

懷鄭洎

風蘭舞幽香
雨葉墮殘滴
美人來不來
前山看向夕

陸龜蒙

江行

酒旗菰葉外
樓影浪花中
布帆張數幅
唯待鯉魚風

夕陽

渡口和帆落
城邊帶角收
如何茂陵客
江上倚危樓

皮日休

和陸魯望

刻石書離恨因成別後悲莫嫌春繭薄猶有萬重絲

司空圖

樂府

寶馬跋塵光雙馳照路旁喧傳報戚里明日幸長楊

韓偓

效崔國輔體

雨過碧苔院霜來紅葉樓閒堦上斜日鸚鵡伴人愁
從獵

蹀躞巴賓馬陪鯁碧野雞忽聞仙樂動賜酒玉偏提

儲嗣宗

早春

野樹花初發空山獨見時踟躕歷陽道鄉思滿南枝

鄭谷

望湖亭

湘水似伊水湘人非故人登臨獨無語風柳自搖春

李收

或作牧

幽情

幽人惜春暮潭上折芳草佳期何時還欲寄千里道

蔣吉

石城

繫纜石城下孤吟懷暫開江人撓艇子將謂莫愁來

西鄙人

哥舒歌

北斗七星高哥舒夜帶刀至今窺牧馬不敢過臨洮

荆叔

題慈恩寺塔

漢國山河在秦陵草木深暮雲千里色無處不傷心

釋靈澈

題天姥

天台衆峰外歲晚當寒空有時半不見崔嵬在雲中

遠公墓

古墓石稜稜寒雲晚照凝空悲虎溪月不見鴈門僧

釋貫休

聞笛

霜月夜徘徊樓中羌笛催曉風吹不盡江上落殘梅

洞庭龍女

與許漢陽

海門連洞庭每去三千里十載一歸來辛苦瀟湘水

湘驛女子

題玉溪

紅樹醉秋色碧溪彈夜絃佳期不可再風雨杳如年

安邑坊女子

幽恨詩

卜得上峽日秋江風浪多江陵一夜雨腸斷木蘭歌

唐人萬首絕句選卷二

欽定四庫全書

唐人萬首絕句選卷三

宋 洪邁 元本

刑部尚書王士禎選

七言一

杜審言

贈蘇書記

知君書記本翩翩為許從戎赴朔邊紅粉樓中應計日

燕支山下莫經年

張說

送梁六

巴陵一望洞庭秋，日見孤峰水上浮。
聞道神仙不可接，心隨湖水共悠悠。

張敬忠

邊詞

五原春色舊來遲，二月垂楊未挂絲。
即今河畔冰開日

正是長安花落時

王翰

春日思歸

楊柳青青杏發花
年光誤客轉思家
不知湖上菱歌女
幾箇春舟在若耶

涼州詞

蒲桃美酒夜光杯
欲飲琵琶馬上催
醉卧沙場君莫笑
古來征戰幾人回

李白

結襪子

燕南壯士吳門豪
筑中置鉛魚
隱刀感君恩
重許君命
太山一擲輕鴻毛

長門怨

桂殿長愁不記春
黃金四壁起秋塵
夜懸明鏡秋天上
獨照長門宮裏人

越中懷古

越王勾踐破吳歸戰士還家盡錦衣
宮女如花滿春殿
祇今惟有鷓鴣飛

送孟浩然之廣陵

故人西辭黃鶴樓煙花三月下揚州
孤帆遠影碧空盡
惟見長江天際流

春夜雒陽聞笛

誰家玉笛暗飛聲散入東風滿洛城
此夜曲中聞折柳
何人不起故園情

峨眉山月歌

峨眉山月半輪秋影入平羌
江水流夜發青溪向三峽
思君不見下渝州

橫江詞

二首

海潮南去過潯陽牛渚由來險
馬當橫江欲渡風波惡
一水牽愁萬里長

橫江館前津吏迎向余東指海
雲生郎今欲渡緣何事
如此風波不可行

上皇西巡南京歌

莫道君王行路難
六龍西幸萬人歡
地轉錦江成渭水
天迴玉壘作長安

黃鶴樓聞笛

一為遷客去長沙
西望長安不見家
黃鶴樓中吹玉笛
江城五月落梅花

下江陵

朝辭白帝彩雲間
千里江陵一日還
兩岸猿聲啼不住

輕舟已過萬重山

望五老峰

廬山東南五老峰青天削出金芙蓉九江秀色可攬結
吾將此地巢雲松

宣城見杜鵑花

蜀國曾聞子規鳥宣城還見杜鵑花一叫一回腸一斷
三春三月憶三巴

舟下荆門

霜落荆門煙樹空
布颿無恙挂秋風
此行不為鱸魚膾
自愛名山入剡中

與賈舍人至汎洞庭

二首

洞庭西望楚江分
水盡南天不見雲
日落長沙秋色遠
不知何處弔湘君

洞庭湖西秋月輝
蕭湘江北早鴻飛
醉客滿船歌白紵
不知霜露入秋衣

巴陵贈賈舍人

賈生西望憶京華
湘浦南遷莫怨嗟
聖主恩深漢文帝
憐君不遣到長沙

望天門山

天門中斷楚江開
碧水東流向北迴
兩岸青山相對出
孤帆一片日邊來

長門怨

天迴北斗挂西樓
金屋無人螢火流
月光欲到長門殿
別作深宮一段愁

陌上贈美人

白馬驕行踏落花
垂鞭直拂五雲車
美人一笑寒珠箔
遙指紅樓是妾家

王昌齡

閨怨

閨中少婦不知愁
春日凝妝上翠樓
忽見陌頭楊柳色
悔教夫壻覓封侯

聽流人水調子

孤舟微月對楓林分付鳴箏與客心
嶺色千重萬重雨斷腸收與淚痕深

梁苑

梁園秋竹古時煙城外風悲欲暮天
萬乘旌旗何處在平臺賓客有誰憐

別李浦之京

故園今在灞陵西江畔逢君醉不迷
小弟鄰莊尚漁獵一封書寄數行啼

甘泉歌

乘興執玉已登壇
細草霑衣春殿寒
昨夜雲生拜初月
萬年甘露水晶盤

芙蓉樓送辛漸
二首

寒雨連江夜入吳
平明送客楚山孤
洛陽親友如相問
一片冰心在玉壺

丹陽城南秋海陰
丹陽城北楚雲深
高樓送客不能醉
寂寂寒江明月心

重別李評事

莫道秋江離別難
舟船明日是長安
吳姬緩舞留君醉
隨意青楓白露寒

送狄宗亨

秋在水清山暮蟬
洛陽樹色鳴皋煙
送君歸去愁不盡
又惜空度涼風天

送別魏二

醉別江樓橘柚香
江風引雨入船涼
憶君遙在湘山月

愁聽清猿夢裏長

盧溪別人

武陵溪口駐扁舟
溪水隨君向北流
行到荆門上三峽
莫將孤月對猿愁

長信秋詞

三首

金井梧桐秋葉黃
珠簾不卷夜來霜
熏籠玉枕無顏色
卧聽南宮清漏長

奉帚平明金殿開
且將團扇共徘徊
玉顏不及寒鴉色

猶帶昭陽日影來

真成薄命久尋思
夢見君王覺後疑
火照西宮知夜飲
分明複道奉恩時

西宮春怨

西宮夜靜百花香
欲卷珠簾春恨長
斜抱雲和深見月
朦朧樹色隱昭陽

西宮秋怨

芙蓉不及美人妝
水殿風來珠翠香
却恨含情掩秋扇

空懸明月待君王

從軍行

五首

烽火城西百尺樓
黃昏獨坐海風秋
更吹羌笛關山月
無那金閨萬里愁

琵琶起舞換新聲
總是關山離別情
撩亂邊愁聽不盡
高高秋月照長城

青海長雲暗雪山
孤城遙望玉門關
黃沙百戰穿金甲
不破樓蘭終不還

秦時明月漢時關
萬里長征人未還
但使龍城飛將在
不教朔馬度陰山

大漠風塵日色昏
紅旗半卷出轅門
前軍夜戰洮河北
已報生禽吐谷渾

殿前曲

昨夜風開露井桃
未英前殿月輪高
平陽歌舞新承寵
簾外春寒賜錦袍

青樓怨

香幃風動花入樓高調鳴箏緩夜愁腸斷關山不解說
依依殘月下簾鉤

青樓曲 二首

白馬金鞍從武皇旌旗十萬宿長楊樓頭小婦鳴箏坐
遙見飛塵入建章

馳道楊花滿御溝紅妝漫綰上青樓金章紫綬千餘騎
夫婿朝回初拜侯

河上歌

河上老人坐古槎和丹只用青蓮花至今八十如四十
口道滄溟是我家

王維

送元二使安西

渭城朝雨裊輕塵客舍青青柳色新
勸君更盡一杯酒西出陽關無故人

少年行

三首

新豐美酒斗十千咸陽遊俠多少年
相逢意氣為君飲

繫馬高樓垂柳邊

一身能擘兩雕弧
邊騎千重只似無
側坐金鞍調白羽
紛紛射殺五單于

漢家君臣歡宴終
高議雲臺論戰功
天子臨軒賜侯印
將軍佩出明光宮

寄段十六

與君相見即相親
聞道君家住孟津
為見行舟試借問
客中時有洛陽人

九月九日憶山東兄弟

獨在異鄉為異客每逢佳節倍思親遙知兄弟登高處
徧插茱萸少一人

送韋評事

欲逐將軍取右賢沙場走馬向居延遙知漢使蕭關外
愁見孤城落日邊

送沈子

楊柳渡頭行客稀
畧師蕩槳向臨沂
唯有相思似春色

江南江北送君歸

寒食汜上作

廣武城邊逢暮春
汶陽歸客淚沾巾
落花寂寂啼山鳥
楊柳青青渡水人

涼州詞

涼州城外少行人
百尺峰頭望塞塵
健兒擊鼓吹羌笛
共賽城東越騎神

王之渙

涼州詞

黃河遠上白雲間一片孤城萬仞山羌笛何須怨楊柳
春光不度玉門關

杜甫

江畔獨步尋花

三首

稠花亂蘂裏江濱行步歎危實怕春詩酒尚堪驅使在
未須料理白頭人

黃師塔前江水東春光懶困倚微風桃花一簇開無主

可愛深紅間淺紅

黃四娘家花滿溪千朵萬朵壓枝低
流連戲蝶時時舞
自在嬌鶯恰恰啼

戲作寄上漢中王

謝安舟楫風還起
梁苑池臺雪欲飛
杳杳東山攜漢妓
泠泠修竹待王歸

和嚴鄭公軍城早秋

秋風嫋嫋動高旌
玉帳分弓射敵營
已收滴博雲間戍

更奪蓬婆雪外城

解悶

四首

商胡離別下揚州憶上西陵故驛樓為問淮南米貴賤
老夫乘興欲東遊

一辭故國十經秋每見秋瓜憶故丘今日南湖采薇蕨
何人為覓鄭瓜州

不見高人王右丞輞川丘壑蔓寒藤最傳秀句寰區滿
未絕風流相國能

復憶襄陽孟浩然清詩句句盡堪傳即今耆舊無新語
漫釣槎頭縮項鱖

戲為絕句

才力應難跨數公祇今誰是出羣雄或看翡翠蘭苔上
未掣鯨魚碧海中

承聞河北諸將入朝口號

十二年來多戰場天威已息陣堂堂神靈漢代中興主
功業汾陽異姓王

江南逢李龜年

岐王宅裏尋常見，崔九堂前幾度聞。
正是江南好風景，落花時節又逢君。

孟浩然

送杜十四之江南

荆吳相接水為鄉，君去春江正淼茫。
日暮孤帆泊何處，天涯一望斷人腸。

常建

送宇文六

花暝垂楊漢水清
微風林裏一枝輕
祇今江北還如此
愁殺江南離別情

三日尋李九莊

雨歇楊林東渡頭
永和三日蕩輕舟
故人家在桃花岸
直到門前溪水流

高適

除夜

旅館寒燈獨不眠客心何事轉悽然故鄉今夜思千里
霜鬢明朝又一年

營州歌

營州少年厭原野狐裘蒙茸獵城下一飲千鍾不醉人
自來十歲能騎馬

塞上聞笛

雪淨遙天牧馬還月明羌笛戍樓閒借問梅花何處落
風吹一夜滿關山

九曲詞

鐵騎橫行鐵嶺頭西看邏逤取封侯
青海祇今將飲馬黃河不用更防秋

岑參

玉關寄長安主簿

東去長安萬里餘故人何惜一行書
玉關西望腸堪斷況復明朝是歲除

送人

西原驛路挂城頭客散江亭雨未休君去試看汾水上
白雲猶似漢時秋

赴北庭度隴思家

西向輪臺萬里餘也知鄉信日應疎隴山鸚鵡能言語
為報家人數寄書

封大夫破播仙凱歌

二首

漢將承恩西破戎捷書先奏未央宮天子預開麟閣待
祇今誰數貳師功

日落轅門鼓角鳴
千羣面縛出蕃城
洗兵魚海雲迎陣
秣馬龍堆月照營

儲光義

寄孫山人

新林二月孤舟還
水滿清江花滿山
借問故園隱君子
時時來往在人間

明妃曲

日暮驚沙亂雪飛
傍人相勸易羅衣
強來前帳看歌舞

共待單于夜獵歸

賈至

已陵夜別王八員外

柳絮飛時別洛陽
梅花發後在三湘
世情已逐浮雲散
離恨空隨江水長

送李侍郎赴常州

雪晴雲散北風寒
楚水吳山道路難
今日送君須盡醉
明朝相憶路漫漫

春思

紅粉當壚弱柳垂金花
臘酒解酴醾笙歌日暮能留客
醉殺長安輕薄兒

巴陵與李十二裴九汎洞庭

二首

江上相逢皆舊遊
湘山永望不堪愁
明月秋風洞庭水
孤鴻落葉一扁舟

楓岸紛紛落葉多
洞庭秋水晚來波
乘興輕舟無近遠
白雲明月弔湘娥

李頎

遇劉五

洛陽一別梨花新黃鳥飛飛逢故人攜手當年共為樂
無驚蕙草惜殘春

寄韓朋

為政心閒物自閒朝看飛鳥暮飛還寄書河上神明宰
羨爾城頭姑射山

綦毋潛

過上人蘭若

山頭禪室挂僧衣
牕外無人溪鳥飛
黃昏半在下山路
却聽鐘聲連翠微

崔國輔

白紵詞

洛陽梨花落如霰
河陽桃葉生復齊
坐恐玉樓春欲盡
紅綿粉絮裛妝啼

張旭

古本作
張顥

桃花磯

隱隱飛橋隔野煙
石磯西畔問漁船
桃花盡日隨流水
洞在青溪何處邊

山中留客

山光物態弄春暉
莫為輕陰便擬歸
縱使晴明無雨色
入雲深處亦沾衣

嚴武

軍城早秋

昨夜秋風入漢關
朔雲邊月滿西山
更催飛將追驕敵
莫遣沙場匹馬還

薛維翰

怨歌

百尺朱樓臨狹斜
新妝能唱美人車
皆言賤妾紅顏好
要自狂夫不憶家

李華

春行寄興

宜陽城下草萋萋
澗水東流復向西
芳樹無人花自落
春山一路鳥空啼

獨孤及

海上懷華中舊遊

涼風臺上三峰月
不夜城邊萬里沙
離別莫言關塞遠
夢魂長在子真家

元結

款乃曲

二首

湘江二月春水平滿月和風宜夜行
唱撓欲過平陽戍
津吏相呼問姓名

千里楓林煙雨深無朝無暮有猿吟
停撓靜聽曲中意
好是雲山韶護音

韋應物

登樓寄王卿

踏閣攀林恨不同楚雲滄海思無窮
數家砧杵秋山下
一郡荊榛寒雨中

寄諸弟

雨中禁火空齋冷江上流鶯獨坐聽把酒看花想諸弟
杜陵寒食草青青

故人重九日求橘

憐君卧病思新橘試摘猶酸亦未黃書後欲題三百顆
洞庭須待滿林霜

休日訪人不遇

九日驅馳一日閒尋君不遇又空還怪來詩思清人骨

門對寒流雪滿山

登寶意上方

翠嶺香臺出半天
萬家煙樹滿晴川
諸僧近住不相識
坐聽微鐘憶往年

滁州西澗

獨憐幽草澗邊生
上有黃鸝深樹鳴
春潮帶雨晚來急
野渡無人舟自橫

荅東林道士

紫閣西邊第幾峰茅齋夜雪虎行蹤遙看黛色知何處
欲出山門尋暮鐘

劉長卿

送劉萱之道州謁崔大夫

沅水悠悠湘水春臨歧一望一沾巾
信陵門下三千客君到長沙見幾人

送李判官之潤州行營

萬里辭家事鼓鼙金陵驛路楚雲西
江春不肯留行客

草色青青送馬蹄

寄別朱拾遺

天書遠召滄浪客
幾度臨歧病未能
江海茫茫春欲徧
行人一騎發金陵

錢起

歸鴈

瀟湘何事等閒回
水碧沙明兩岸苔
二十五弦彈夜月
不勝清怨却飛來

李嘉祐

王舍人竹樓

傲吏身閒笑五侯
西江取竹起高樓
南風不用蒲葵扇
紗帽閒眠對水鷗

題虔上人壁

詩思禪心共竹閒
任池流水向人間
手持如意高牕裏
斜日沿江千萬山

韓翃

送客之鄂州

江口千家帶楚雲
江花亂點雪紛紛
春風落日誰相見
青翰舟中有鄂君

送齊山人

舊事仙人白兔公
掉頭歸去又乘風
柴門流水依然在
一路寒山萬木中

寒食

春城無處不飛花
寒食東風御柳斜
日暮漢宮傳蠟燭

輕煙散入五侯家

宿石邑山中

浮雲不共此山齊
山靄蒼蒼望轉迷
曉月暫飛千樹裏
秋河隔在數峰西

江南曲

長樂花枝雨點消
江城日暮好相邀
朱樓不閉葳蕤鎖
綠水迴通宛轉橋

酬張千牛

蓬萊闕下事天家
上路初回白鼻騮
細管畫催平樂酒
春衣夜宿杜陵花

贈李冀

王孫別舍擁朱輪
不羨空名樂此身
門外碧潭春洗馬
樓前紅燭夜迎人

送人之潞州

官柳青青匹馬嘶
回風暮雨入銅鞮
佳期別在春山裏
應是人參五葉齊

少年行

千點斑斕噴玉驄
青絲結尾繡纏髭
鳴鞭曉出章臺路
葉葉春衣楊柳風

皇甫冉

荅張繼

悵望南徐登北固
迢迢西塞阻東關
落日臨川問音信
寒潮惟帶夕陽還


送魏十六

秋夜沈沈此送君
陰蟲切切不堪聞
歸舟明日毘陵道
回首姑蘇是白雲

皇甫曾

巖嶺西望

漢家仙仗在咸陽
洛水東流出建章
野老至今猶望幸
離宮秋樹獨蒼蒼



唐人萬首絕句選卷三